

TORITENY - ALAHADY TSOTRA FAHA 2 - TAONA B



SAMY NANTSOIN'ANDRIAMANITRA TSIRAIRAY ISIKA

Ry Kristianina Havana malala, amin'izao Alahady tsotra faharoa mandavantaona dia mampiditra antsika tanteraka amin'ny fandalinam-pinoana ka hivelomantsika ny hafatra ao amin'ny taratasy pastoraly faha 8 fa indrindra ny annexe mikasika ny fianakaviana eglizy kely miara-mikolokolo sy mikarakara ny zavaboary. Araka ny voalazantsika matetika tsy misy kisendrasendra ao amin'Andriamanitra fa ataony izao rehetra izao hahasoa izay tia azy ka inona tokoa fa mifanojo tsara ny hafatra pastôraly sy fanambaran'i Papa mikasika ny taonan'I Md Josefa sy taonan'ny Fianakaviana sy ny fikatrohana pastôraly ataontsika araka ny hafatra pastôraly n° 8 sy ireo annexes. Mila Baba, mila Ray izao tontolo izao hoy ny Papa ka I Md Josefa no modely sady mpivavaka mba ho tanteraka tokoa io faniriana io dia nataony ho taonan'ny Fianakaviana mandinika ny Amoris Laetecia ity taona ity izany hoe hivavahana sy handalinana ny fianakaviana fa fankalazana ny faha 5 namoahana an'io Fampirasihina

Vakiteny I : 1 Sam. 3, 3b-10. 19

Tononkira : Sal. 36

Vakiteny II : 1 Kôr. 6, 12e-15a. 17-20

Evanjely : Jo. 1, 35-42

Apostolika vokatry ny sinaoda mikasika ny fianakaviana ka namohana ilay vavaka ataontsika miaraka amin'ny Fianakaviana Masina ataontsika isaky ny sabotsy sy ny alahady. Mananetana antsika hikatoka koa eo anivon'ny fianakaviana amin'ny fanatanterahanany ny hafatra amin'izao dingana faharoa fa indrindra amin'ny fiarovana sy

fikolokoloana ny zavaboary ary amin'ny fambolena kakazo. Mivelona ihany ko any hafatry ny 1 janoary isika : “mila mamboly kolotsaina mikokolo fifandraisana (culture des soins)

hitondra amin'ny fandriampahalemena sy fiadanana". Fivelomana an'izany ny ataontsika amin'ny fikarakarana ny zavaboary amin'ny fambolena kakazo

Ny vakiteny telo ampitain'ny Eglizy amintsika androany dia miresaka an'Andriamanitra miantso antsika tsirairay avy satria tiany isika ary ao anatin'izany hafaliana izany no tiany hamokatra. Isika rahateo mangetaheta mba hanana ny fiadanana sy ny hasambarana ka maniry isika mba hamokatra ny fiainantsika sy hamokatra be dia be, ary tsy ho antsika ihany fa ho an'ny firenentsika, ho an'ny fianakaviansika, ho an'ny Eglizintsika.

Miantso antsika tokoa Andriamanitra, miantso antsika izy tahaka ny niantsoany an'i Samoela izay nohenointsika tamin'ny vakiteny voalohany.

Tsy nazava tamin'i Samoela ny antson'Andriamanitra tamin'ny voalohany. Aza gaga isika raha misy zavatra mitranga eo amin'ny fiainantsika toa tsy mazava, raha misy antson'Andriamanitra tsy mazava amintsika dia mila mpanelanelana isika. Na dia ny mpanelanelana koa aza dia tsy tonga dia mazava aminy avy hatrany izany antso izany fa mila miezaka sy mitoky amin'ny asan'ny Fanahy Masina mpanazava izy mba ho afaka hanoro sy hampianatra. Izany ny asan'ny Eglizy, Reny izy ka sady mampianatra sy mikolokolo no manambara ny marina. Mety mafy ny fandraisantsika ny marina ampahafantariny antsika. Tsy maintsy harahina sy hampiharina amin'ny fiainana fa ny tanjona dia ny hahafahantsika mahazo tsara ny lalan-kombana.

Eto dia i Elia no mpanelanelana sy mpanoro lalana an'i Samoela. Rehefa niverina fanintelony naheno ny antso ka nanatona an'i Elia i Samoela dia hoy Elia taminy, izao no ambarao raha mbola maheno ny feo miantso ianao : " Inty aho , mitenena fa mihaino ny mpanomponao". Nazava tamin'i Samoela ny antso noho ny fanampian'i Elia.

Amin'izao fanombohan'ny taona izao fa indrindra isika Ray, Baba ary arak any famarintana ny Ray , Baba dia ireo manana fahafehana, toerana manokana eo anivon'ny fiaraha monina, manana fitantana sy fitondrana. Araka ny hafatry ny Papa raha nametraka ho taonan'I Md Josefa ity taona dia aoka hoy izy ny Ray rehetra hahahita, halala ary hivelona ny vôkasiona fa io no miteraka ny korontana satria maro no tsy mivelona ny vôkasiona. Raha i Md Josefa no raisina modely dia lehilahy tia vavaka. Aoka ny Ray izay modely ho an'ny taranaka ho tia vavaka. Aoka ny Ray ho tahaka an'I Md Josefa ho lehilahy marina. Matoa mahantra isika Malagasy tsy hoe tsy misy harena tsy misy manampahaizana tsy misy mpanao politika... Mahantra isika satria mahantra olona marina. Mila mibebaka izay raymandreny mba hahay hampanjaka ny marina. Modely amin'ny fankataovana ny sitrak'Andriamanitra i Md Josefa ka na dia sarotra taminy ny antso niantefa taminy dia niroso izy. Mila matoky an'Andriamanitra izay Ray fa tsy hanao izay saim-pantany. Modely amin'ny asa i Md Josefa ary namelona ny ankohonany tamin'ny asany izy. Mila Ray toa izany koa isika hoy ny Papa fa tsy Ray miteraka fotsiny fa aoka ho Ray mpamelona sy Mpanabe. Mpandrafitra no nahalalan'ny olona an'i Jesoa. Asa nampiaran'i Josefa azy io.

Izany ihany koa no henontsika ao amin'ny Evanjely : mikatsaka ny misy an'i Jesoa ireo mpianatr'i Joany, izany hoe mikatsaka ny vôkasiony... Rehefa nandalo teo akaikin'i Joany i Jesoa, dia nanoro lâlana azy ireo i Joany izay mpanelanelana. Tsy nifikitra tamin'ireo mpianany i Joany fa notadiaviny sy niriny ny mba hahitan'ireo mpianatra ireo ny soa sy ny lalan-kombana, ny vôkasiony ka natorony azy ireo i Jesoa Kristy ilay zanak'ondrin'Andriamanitra. Rehefa nandre izany ireo mpianatra dia nanaraka an'i Jesoa.

Mirary aho mba hahita olona mpanoro lâlana tahaka an'i Joany isika amin'izao depart vaovao, ny fianakaviana eglizy kely mba hahita olona marina mpanoro lâlana, ireo Ray, Baba hahita olona hanoro lalana ka hitondra azy ireo amin'i Jesoa Lalana sy fahamarinana ary fiainana. Aoka isika izay mpanoro lâlana hivelona izay atorontsika fa ny teny manaitra fa ny atao mahasaritka. Sambatra isika eto Madagasikara fa manana modely dia i Victorie Rasoamanarivo, I Frera Rafiringa, I Lucien Botovasoa, namory ireo manodidina azy izy ireo na lehibe na kely fa indrindra ireo manampahefana, nampianatra azy ireo ho olona marina, ho olona tia vavaka, ho tia manompo, ho tia manasoa sy mitoetra ao amin'i Kristy ka manatanteraka izay sitrak'Andriamanitra. Nisy mpanenjika ihany izy ireo tamin'izany satria tsy misorona, tsy mihatsaravelatsihy fa manoro ny marina mandrakariva ary manatanterka izay lazaina ka nanelingelina ny maro

Nanatona an'i Jesoa ireo mpianatra ireo, ka nanontany i Jesoa nanao hoe : “iza no tadiavinareo ?” Fantatr'i Jesoa ny zavatra tadiavintsika ka arahontsika izy dia ho sambatra ny fiainantsika.

Manomboka ny taona, maro ny zavatra mifamahofaho amin'ny fiainantsika, eo ity KORONTANAVIRUS ity ary maniry hanao “depart vaovao, fiangana vaovao” manontany isika tsirairay I Jesoa izao : inona no tadiavintsika ?

Raha mitady an'i Jesoa isika dia hahita vokatra be satria Izy nilaza fa izay mitoetra ao Amiko no hamokatra be. Koa manatona Azy isika raha te-hamokatra. Izany hoe mila SAFIDY mitondra amin'ny fiovam-penitra mahery vaika izany hoe depart vaovao

Namaly ny mpianatra i Jesoa nanao hoe “avia ka ho hitanareo”, raha mamaly an'i Jesoa koa isika dia sady efa mahita Azy no hitoetra ao Aminy sy hamokatra be.

I Simona Piera tamin'izay dia nitady hanatona Azy ka nifanena taminy rehefa nolazain'ireo rahalahiny hoe efa hitanay ny Mesia. Enga anie isika araky ny voalazan'i Papa Ray Masina mba ho tahaka ny olona mpivahinin'ny finoana ka izay mifanena amintsika dia mahita ny Mesia avy amin'ny fiainantsika. Tahaka an'i Simona nifanena tamin'ny rahalahiny.

Enga anie isika EOVI MISIONERA VITA BATEMY TABERNAKLA VELONA ho famantarana ho an'ireo manodidina antsika, ka amin'izay i Jesoa hilaza amintsika tsirairay avy, satria mifototra ao Aminy isika, tahaka ny nilazany tamin'i Piera hoe : “ ianao no Simona zanak'i Joany izay atao hoe Sefasy, ianao no Piera izany hoe vato” izay mijoro tsy azo hozongozonina. Ho vato anie isika tsirairay ka hifikitra tsara amin'ny famonjena ka ho zary

famonjena ho an'ireo manodididna antsika. Izany no antenaintsika amin'izao taona vaovao izao mba hivahatra tsara ny finoantsika ka ho zary famantaram-pamonjena satria olo araiky ao amin'i Kristy isika.

Aoka ho olom-baovao ao amin'i Kristy isika araky ny hafatry Md Paoly ao amin'ny vakiteny faharoa mba tsy ho azon'ny rendrarendran'izao tontolo izao, izany hoe tsy hampifangaro ny fiainantsika amin'ny fiainana maro samihafa fa ho tena rantsam-batan'i Kristy tokoa isika, ho iray Aminy amin'izay ho lavitra antsika ireo fitondran-tena ratsy, ho lavitra ny fijangajangana isika izany hoe ny fifangaroan-javatra eo amin'ny fiainantsika. Ny fijangajangana ara-nofa no faran-tampony fa misy ny ara-tsaina sy ara-panahy ihany koa. Araky ny voalazan'i Md Paoly, ny fahotana hafa rehetra dia ataon'ny olona ivelan'ny tenany fa ny fijangajangana no ataony amin'ny tenany. Aoka ho tempolin'Andriamanitra isika, tahaka an'i Samoela, tahaka an'ireo Apôstôly ka hifikitra Aminy, hitoetra ao Aminy ka hamokatra eo amin'ny fiainantsika. Aoka hiombona Aminy tanteraka isika.

Ry Jesoa Tompo, Ianao miantso anay ho Eglizy Fianakaviamben'Andriamanitra ary miantso anay tsirairay avy ho EOVI MISIONERA ka ampio izahay hahay hamaly Anao, hahay hampihatra sy hampiasa ny talentanay tsirairay avy mba hifanasoavanay, hoentinay hanasoa ny hafa, hanehoanay ny fifankatiavana ka hiala amin'ny fiainana tsizarizary izahay fa ho tena taranaka mpampijoro tokoa, ho taranaka hiala amin'ny fitondran-tena ratsy ka ho taranaka mpanorina tokoa izahay dia ho vonona mandrakariva hanatanteraka ny sitraponao amin'ny alalan'ny asa ampanaovinao anay mba ho fiderana Anao sy ho fanomezam-boninahitra ny anaranao. Ry Masina Maria Reninay sy Md Josefa Ray Mpiaron'ny Eglizy Erantany mivavahà ho anay mba hahay hivelona ny vôlekinay izay. Mivavahà manokana ho an'ny Ray mba halala sy hiaina ny vôlekina maha Ray maha Baba izy ireo. Amen

Mompera Arseveka Mgr Benjamin Ramaroson